

09/07/1998

Konsert Antara Dua Irama meriah

Hardi Effendi Yaacob

KONSERT Antara Dua Irama - P Ramlee Dalam Kenangan, malam kelmarin berlangsung dalam suasana meriah dan berwarna-warni bertepatan tema siaran NTV7, Saluran Ceria Anda.

Ia dimulakan tepat jam 8.45 malam, sejeurus selepas Perdana Menteri, Datuk Seri Dr Mahathir Mohamad menyempurnakan Upacara Perasmian Pusat Penyiaran NTV7 di Shah Alam, Selangor dan Kuching, Sarawak.

Sketsa pendek, berlatarbelakangkan suasana penggambaran daripada adegan filem Hang Tuah membuka tirai konsert itu yang menampilkan gabungan artis veteran dan baru, seperti membabitkan Aziz Sattar, S Shamsuddin, Dee, Ida Nerina dan Afdlin Shauki.

Berdasarkan pengamatan, kebanyakan dialog sudahpun diubahsuai dan tidak lagi bergantung kepada skrip asal bagi memastikan ia sesuai dengan keadaan semasa.

Adegan lucu itu menggambarkan Aziz Sattar dan S Shamsuddin mengungkapkan dialog dan menggayakan aksi spontan. Kemampuan dua seniman ini nyata masih sama seperti yang mereka lakukan dalam filem Seniman Bujang Lapok dan Pendekar Bujang Lapok.

Selain Jay Jay dengan Joget Pahang, muzik iringan dialunkan secara langsung oleh sekumpulan pemuzik seperti Lewis Pragasam (dram), Mac Chew (keyboard), Hanafi Imam (bass akustik), Josie Thomas (gitar), Mat Shah (saksofon), Rejap (trombon) dan Connie Soliano (trompet).

Komposer veteran, Yusnor Ef tampil dalam segmen yang mirip kepada singkapan nostalgia terhadap P Ramlee ketika di Singapura.

Pada masa yang sama, Afdlin Shauki, Ida Nerina dan Aziz Sattar cuba melakonkan semula adegan seperti yang diceritakan sebelum Erra Fazira yang berpakaian serba putih menyanyikan lagu Berkorban Apa Sahaja.

Tidak lama selepas itu, Afdlin muncul dengan melakonkan watak Kassim Selamat, manakala Ida pula membawakan watak Combi dalam filem Ibu Mertuaku.

Adegan itu cuma memakan masa dua minit diikuti nyanyian lagu Putus Sudah Kasih Sayang membabitkan gabungan tiga penyanyi iaitu Camelia, Ning Baizura dan Sam daripada kumpulan Innuendo.

Selain Aziz Sattar, S Shamsuddin dan Yusnor Ef, artis veteran lain yang turut mengambil bahagian dalam konsert ini adalah Aziz Jaafar serta Kassim Masdor.

Manakala artis angkatan baru pula termasuk Ziana Zain, A To Z, Sharizan dan Siti Nurhaliza.

Hadir sama, penggiat filem dan muzik veteran seperti Datuk L Krishnan, Datuk Jins Shamsudin, Hashimah Yon, Datuk Zain Hamzah dan Neng Yatimah.

Konsert Antara Dua Irama - P Ramlee Dalam Kenangan berteraskan konsep hiburan dokumentari, dengan penonton dibawa mengimbas kembali zaman kebangkitan muzik dan filem Melayu di Jalan Ampas, Singapura serta Studio Merdeka, Kuala Lumpur sekitar 1960-an.

(END)